

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՆԵՐՔԻՆ ԳՈՐԾԵՐԻ ՆԱԽԱՐԱՐՈՒԹՅԱՆ ԿՐԹԱՀԱՄԱԼԻՐԻ  
ԳԻՏԱԿԱՆ ԽՈՐՀՈՒՐԴ  
Ո Ր Ո Շ ՈՒ Մ**

**13.05 2025 թվականի № 14**

**ԱՎԱՐՏԱԿԱՆ ԱՇԽԱՏԱՆՔԻ ԵՎ ՄԱԳԻՍՏՐՈՍԱԿԱՆ ԹԵԶԻ ԸՆՏՐՈՒԹՅԱՆ,  
ՊԱՏՐԱՍՏՄԱՆ ԵՎ ՊԱՇՏՊԱՆՈՒԹՅԱՆ ԿԱՐԳԸ ՍԱՀՄԱՆԵԼՈՒ  
ԵՎ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ  
ԿՐԹԱՀԱՄԱԼԻՐԻ ԳԻՏԱԿԱՆ ԽՈՐՀՐԴԻ 2015 ԹՎԱԿԱՆԻ ՓԵՏՐՎԱՐԻ 11-Ի ԹԻՎ  
2, ՃԳՆԱԺԱՄԱՅԻՆ ԿԱՌԱՎԱՐՄԱՆ ՊԵՏԱԿԱՆ ԱԿԱԴԵՄԻԱՅԻ ԳԻՏԱԿԱՆ  
ԽՈՐՀՐԴԻ 2022 ԹՎԱԿԱՆԻ ՀՈՒԼԻՍԻ 15-Ի ԹԻՎ 4 ՆԻՍՏԵՐՈՒՄ ՀԱՍՏԱՏՎԱԾ  
ԿԱՐԳԵՐԸ, ԻՆԶՊԵՍ ՆԱԵՎ ՃԳՆԱԺԱՄԱՅԻՆ ԿԱՌԱՎԱՐՄԱՆ ՊԵՏԱԿԱՆ  
ԱԿԱԴԵՄԻԱՅԻ ԳԻՏԱԿԱՆ ԽՈՐՀՐԴԻ 2020 ԹՎԱԿԱՆԻ ՆՈՅԵՄԲԵՐԻ 20-Ի ԹԻՎ  
6 ՆԻՍՏՈՒՄ ՀԱՍՏԱՏՎԱԾ ԿԱՆՈՆԱԿԱՐԳՆ ՈՒԺԸ ԿՈՐՑՐԱԾ ՃԱՆԱԶԵԼՈՒ  
ՄԱՍԻՆ**

Ղեկավարվելով «Նորմատիվ իրավական ակտերի մասին» ՀՀ օրենքի 37-րդ հոդվածի 1-ին մասի 1-ին կետով և Հայաստանի Հանրապետության կառավարության 2024թ. դեկտեմբերի 12-ի N 1989-Ն որոշմամբ հաստատված «Հայաստանի Հանրապետության ներքին գործերի նախարարության կրթահամալիր» պետական ոչ առևտրային կազմակերպության կանոնադրության 52-րդ կետի 3-րդ ենթակետով՝ Հայաստանի Հանրապետության ներքին գործերի նախարարության կրթահամալիրի գիտական խորհուրդը **որոշում է՝**

1. Սահմանել ավարտական աշխատանքի և մագիստրոսական թեզի ընտրության, պատրաստման և պաշտպանության կարգը՝ համաձայն հավելվածի:

2. Ուժը կորցրած ճանաչել ՀՀ ոստիկանության կրթահամալիրի գիտական խորհրդի՝ 2015 թվականի փետրվարի 11-ի թիվ 2 նիստում հաստատված՝ ավարտական աշխատանքի և մագիստրոսական թեզի ընտրության, պատրաստման և պաշտպանության կարգը, Ճգնաժամային կառավարման պետական ակադեմիայի գիտական խորհրդի՝ 2020 թվականի նոյեմբերի 20-ի թիվ 6 նիստում հաստատված՝ ակադեմիայի մագիստրոսական թեզերի պատրաստման և պաշտպանության կազմակերպման կանոնակարգը և 2022 թվականի հուլիսի 15-ի թիվ 4 նիստում հաստատված՝ ակադեմիայի բակալավրի կրթական ծրագրի ավարտական աշխատանքի պատրաստման և գնահատման կարգը:

3. Սույն որոշումն ուժի մեջ է մտնում ընդունման պահից:

**ՀՀ ՆԳՆ ԿՐԹԱՀԱՄԱԼԻՐԻ ՌԵԿՏՈՐԻ  
ԺԱՄԱՆԱԿԱՎՈՐ ՊԱՇՏՈՆԱԿԱՏԱՐ,  
ԻՆՔԸ ԵՎ ՀՀ ՆԳՆ ԿՐԹԱՀԱՄԱԼԻՐԻ  
ԳԻՏԱԿԱՆ ԽՈՐՀՐԴԻ ՆԱԽԱԳԱՀ  
Ք. ԵՐԵՎԱՆ**

**Մ.ՄՈՒՐԱԴՅԱՆ**

**ԿԱՐԳ**

**ԱՎԱՐՏԱԿԱՆ ԱՇԽԱՏԱՆՔԻ ԵՎ ՄԱԳԻՍՏՐՈՍԱԿԱՆ ԹԵԶԻ ԸՆՏՐՈՒԹՅԱՆ,  
ՊԱՏՐԱՍՏՄԱՆ ԵՎ ՊԱՇՏՊԱՆՈՒԹՅԱՆ**

**1. Ընդհանուր դրույթներ**

1. Ավարտական աշխատանքի և մագիստրոսական թեզի ընտրության, պատրաստման և պաշտպանության կարգը (այսուհետ՝ կարգ) սահմանում է կրթահամալիրի սովորողների կողմից ավարտական աշխատանքի և մագիստրոսական թեզի ընտրության, պատրաստման ընթացակարգերը, ինչպես նաև ավարտական աշխատանքի և մագիստրոսական թեզի պաշտպանության կարգը և գնահատման համակարգը:

2. Ավարտական աշխատանքը որակավորման աշխատանք է, որը կոչված է համակարգելու և ամրապնդելու շրջանավարտների գիտելիքներն ու կարողությունները և, որպես կանոն, պետք է ունենա գործնական նշանակություն՝ լուծի մասնագիտական որոշակի խնդիր (խնդիրներ):

3. Մագիստրոսական թեզը որակավորման աշխատանք է, որը վկայում է տվյալ թեմայի ուսումնասիրման մեջ հեղինակի անձնական ներդրման, տեսական գիտելիքների ու գործնական կարողությունների օգտագործմամբ ինքնուրույն գիտագործնական հետազոտություններ անցկացնելու ընդունակության մասին:

4. Ավարտական աշխատանքի և մագիստրոսական թեզի ուղղությամբ կատարվող աշխատանքներն իրականացվում են ուսումնական պլանով նախատեսված ժամանակի շրջանակներում՝ գիտահետազոտական աշխատանքի համար հատկացված ժամերի, մագիստրոսական թեզի և ավարտական աշխատանքի համար նախատեսված ժամերի հաշվին:

5. Սույն կարգը մշակվել է «Կրթության մասին», «Բարձրագույն և հետբուհական մասնագիտական կրթության մասին» օրենքների, Հայաստանի Հանրապետության կրթության և գիտության նախարարի 2017 թվականի նոյեմբերի 7-ի «Հայաստանի Հանրապետության բարձրագույն մասնագիտական կրթական ծրագրեր իրականացնող հաստատությունների շրջանավարտների ամփոփիչ ատեստավորման կարգը հաստատելու և Հայաստանի Հանրապետության կրթության և գիտության նախարարի 2011 թվականի հոկտեմբերի 31-ի N 1197-Ն հրամանը ուժը կորցրած ճանաչելու մասին» N 1282-Ն հրամանի և «Հայաստանի Հանրապետության ներքին գործերի նախարարության կրթահամալիր» պետական ոչ առևտրային կազմակերպության (այսուհետ՝ Կրթահամալիր) կանոնադրության հիման վրա:

## **2. Ավարտական աշխատանքի և մագիստրոսական թեզի թեմայի ընտրությունը**

6. Ավարտական աշխատանքի թեման և ղեկավարը հաստատվում են ավարտական ուստարվա առաջին կիսամյակում՝ մինչև սեպտեմբերի 15-ը, իսկ մագիստրոսական թեզինը՝ մինչև առաջին կուրսի առաջին կիսամյակի ավարտը:

7. Ավարտական աշխատանքի և մագիստրոսական թեզի թեմաներն ընտրվում են կրթահամալիրի ամբիոններում՝ ամբիոնի նիստում նախօրոք քննարկված ու առաջարկվող թեմաների ցանկից:

8. Ավարտական աշխատանքի և մագիստրոսական թեզի թեմաները կարող են առաջարկվել գործատուների կողմից: Ամբիոնների կողմից առաջարկվող թեմաները, ըստ մասնագիտական ոլորտների, կարող են քննարկվել գործատուների հետ:

9. Ավարտական աշխատանքի և մագիստրոսական թեզի թեմայի ընտրության հարցում ամբիոնի կողմից կարող են ընդունվել նաև կրթահամալիրի սովորողների առաջարկները, եթե դրանք հիմնավորված են, համապատասխանում են մասնագիտությանը և չեն կրկնվում:

10. Միևնույն թեմայի ընտրությունը կրթահամալիրի սովորողների կողմից արգելվում է: Եթե նույն թեմային հավակնում են մեկից ավելի սովորողներ, ապա նախապատվությունը տրվում է առավել բարձր առաջադիմություն ունեցողին: Հավասար առաջադիմության դեպքում նախապատվությունը տրվում է այն անձին, ով ամբիոն կներկայացնի թեմային նվիրված առավել հիմնավոր ռեֆերատ:

11. Յուրաքանչյուր ուսումնական տարում ավարտական աշխատանքի և մագիստրոսական թեզի թեմաները ենթակա են վերանայման և չեն կրկնում նախորդ ուստարվա համար առաջարկված թեմաներին:

12. Ավարտական աշխատանքի և մագիստրոսական թեզի թեմաները չպետք է կրկնվեն դրանց պաշտպանությունից հետո առնվազն 3 տարի:

13. Ավարտական աշխատանքի և մագիստրոսական թեզի կատարման համար ամբիոնի կողմից առաջարկվում է ղեկավար:

14. Սովորողների ավարտական աշխատանքի և մագիստրոսական թեզի թեմաներն ու նշանակված ղեկավարների ցուցակները ներկայացվում են ուսումնական ստորաբաժանման խորհրդի հաստատմանը (փոփոխմանը):

## **3. Ավարտական աշխատանքի և մագիստրոսական թեզի կառուցվածքն ու ձևավորումը**

15. Ավարտական աշխատանքը և մագիստրոսական թեզը կազմված են՝

- 1) հայերեն, անգլերեն և ռուսերեն լեզուներով տիտղոսաթերթերից,
- 2) բովանդակությունից (ցանկից),
- 3) ներածությունից,
- 4) աշխատանքի հիմնական մասից (գլուխներ և պարագրաֆներ),

- 5) եզրակացությունից,
- 6) օգտագործված գրականության ցանկից,
- 7) հավելվածներից (եթե այդպիսիք առկա են):

16. Ավարտական աշխատանքի ներածությունում առնվազն անհրաժեշտ է ներկայացնել հետազոտության թեմայի արդիականությունը, հետազոտության նպատակը, հետազոտության օբյեկտը և առարկան, հետազոտության տեսական հիմքը և խնդիրները, հետազոտության նորմատիվ հիմքը և աշխատանքի կառուցվածքը:

17. Մագիստրոսական թեզի ներածությունում անհրաժեշտ է ներկայացնել հետազոտության թեմայի արդիականությունը, թեմայի մշակվածության աստիճանը, հետազոտության նպատակը և խնդիրները, հետազոտության օբյեկտը և առարկան, հետազոտության մեթոդաբանական հիմքը, հետազոտության տեսական հիմքը, հետազոտության փորձառնական (էմպիրիկ) հիմքը, հետազոտության նորմատիվ հիմքը և թեզի կառուցվածքը:

18. Ավարտական աշխատանքի և մագիստրոսական թեզի հիմնական մասը ներկայացվում է գլուխներով: Գլուխները, որպես կանոն, բաղկացած են պարագրաֆներից:

19. Ավարտական աշխատանքի և մագիստրոսական թեզի եզրակացությունը պետք է շարադրված լինի հակիրճ, ընդգրկի հիմնախնդրի արդի վիճակի գնահատականը և լուծման վերաբերյալ առաջարկությունները:

20. Ավարտական աշխատանքը և մագիստրոսական թեզը ներկայացվում են համակարգչային ձևավորման տեսքով՝ պահպանելով հետևյալ կանոնները.

1) Ծավալը՝ ավարտական աշխատանքի համար՝ 40-ից 50 էջ, իսկ մագիստրոսական թեզի համար՝ 60-ից 80 էջ: Նշված ծավալում չեն ընդգրկվում մագիստրոսական թեզի և ավարտական աշխատանքի հավելվածները: Էջանշունը կատարվում է էջի ներքևում՝ մեջտեղում: Ավարտական աշխատանքի և մագիստրոսական թեզի տեքստը գրվում է միայն թերթերի դիմային (առաջին) էջի վրա: Բոլոր գրված էջերը համարակալվում են: Տիտղոսաթերթերը նույնպես ընդգրկվում են համարակալման մեջ, բայց դրանց վրա էջի համարներ չեն դրվում: Հավելվածները համարակալվում են ինքնուրույն կերպով՝ հիմնական տեքստից առանձին: Յուրաքանչյուր հավելված պետք է ունենա անվանում, որն արտացոլում է դրա բովանդակությունը:

2) Սովորողի կողմից պատրաստվող ավարտական աշխատանքի տիտղոսային էջին ներկայացվում են հետևյալ պահանջները՝ էջի վերևի հատվածում՝ կենտրոնում, հետևյալ հերթականությամբ նշվում են՝ «ՀՀ ՆԳՆ ԿՐԹԱՀԱՄԱԼԻՐ», «ՌԻՍՈՒՄՆԱԿԱՆ ՍՏՈՐԱԲԱԺԱՆՄԱՆ ԱՆՎԱՆՈՒՄԸ», «ԱՄԲԻՈՆԻ ԱՆՎԱՆՈՒՄԸ», «ԱՎԱՐՏԱԿԱՆ ԱՇԽԱՏԱՆՔ»: Նշված տեղեկություններից հետո էջի ծախս հատվածում նշվում են՝ հեղինակի անունը և ազգանունը, կոչումը, թեմայի անվանումը, ղեկավարի անունը և ազգանունը, կոչումը, գիտական աստիճանը և գիտական կոչումը (Ձև 1):

3) Մագիստրոսական թեզի տիտղոսային էջին ներկայացվում են հետևյալ պահանջները՝ էջի վերևի հատվածում՝ կենտրոնում, հետևյալ հերթականությամբ նշվում են՝ «ՀՀ ՆԳՆ ԿՐԹԱՀԱՄԱԼԻՐ», «ՈՒՍՈՒՄՆԱԿԱՆ ՍՏՈՐԱԲԱԺԱՆՄԱՆ ԱՆՎԱՆՈՒՄԸ», «ԱՄԲԻՈՆԻ ԱՆՎԱՆՈՒՄԸ», «ՄԱԳԻՍՏՐՈՍԱԿԱՆ ԹԵԶ»: Նշված տեղեկություններից հետո էջի ձախ հատվածում նշվում են՝ հեղինակի անունը և ազգանունը, կոչումը, թեմայի անվանումը, ղեկավարի անունը և ազգանունը, կոչումը, գիտական աստիճանը և գիտական կոչումը (Ձև 2):

4) Ավարտական աշխատանքի և մագիստրոսական թեզի գլուխները և պարագրաֆները տեքստում անհրաժեշտ է առանձնացնել մուգ տառատեսակով (**B-bold**): Յուրաքանչյուր գլուխ անհրաժեշտ է սկսել նոր էջից:

5) Ավարտական աշխատանքի և մագիստրոսական թեզի տեքստը պատրաստվում է՝ Microsoft Office Word ծրագրով, թղթի ֆորմատը՝ A4, տառատեսակը՝ Unicode, տառաչափը՝ 12, տողային միջակայքը՝ 1.5, լուսանցքները՝ ձախից – 3.0 սմ, աջից – 1.5 սմ, ներքևից և վերևից – 2.0 սմ: Նոր պարբերությունը սկսել 1.0 սմ խորքից:

6) Տեքստն ամբողջությամբ հավասարեցվում է ըստ լայնության:

7) Հղումներին ներկայացվում են տեխնիկական հետևյալ պահանջները. տառատեսակը՝ Unicode, տառաչափը՝ 10, տողային միջակայքը՝ 1.0:

8) Հղումները ներառում են հետևյալ տվյալները՝

ա. աշխատության հեղինակի ազգանունն ամբողջությամբ, անվան և հայրանվան առաջին տառերը,

բ. աշխատության լրիվ անվանումը,

գ. տպագրության վայրը,

դ. տպագրության տարին,

ե. այն էջերի հերթական համարները, որտեղ հանդիպում է մեջբերված տեքստը (օր.՝ Պողոսյան Պ.Պ. Իրավագիտություն: Երևան, 2014: էջ 26-27.):

9) Եթե հղում է կատարվում գիտական հոդվածների ժողովածուին կամ ամսագրին, ապա այն ունենում է հետևյալ տեսքը՝

ա. հեղինակի ազգանունն ամբողջությամբ, անվան և հայրանվան առաջին տառերը,

բ. հոդվածի լրիվ անվանումը,

գ. ժողովածուի կամ ամսագրի անվանումը,

դ. գիտական հանդեսի կամ ամսագրի հերթական և ընդհանուր համարը,

ե. տպագրության տարին,

զ. այն էջերի հերթական համարները, որտեղ հանդիպում է մեջբերված տեքստը (օր.՝ Պողոսյան Պ.Պ. Ապացուցման հիմնահարցերը քրեական դատավարությունում // Իրավագիտության հարցեր: № 13 (79), 2014: էջ 26-27.):

10) Ինտերնետային կայքին հղում կատարելիս ինտերնետ-հասցեն նշվում է ամբողջությամբ: Օր.՝ URL:[https://www.e-gov.am/u\\_files/arc\\_voroshum/Mar9-6\\_1.pdf](https://www.e-gov.am/u_files/arc_voroshum/Mar9-6_1.pdf).

11) Օգտագործված գրականության ցանկում նշվում են օգտագործված աղբյուրների (գիրք, իրավական ակտ, ինտերնետային կայք և այլն) վերաբերյալ բոլոր տվյալները, այդ թվում՝ գրքի լրիվ էջերի քանակը:

12) Իրավական ակտերի վերաբերությամբ նշվում են՝ դրա անվանումը, իրավական ակտի ընդունման տարեթիվը, իրավական ակտի համարը, ՀՀ պաշտոնական տեղեկագրի հերթական և ընդհանուր համարը, որտեղ այն տպագրվել է, և նշված տեղեկագրում հոդվածի համարը, որում իրավական այդ ակտը տեղակայվել է (օր.՝ «Օպերատիվ-հետախուզական գործունեության մասին» ՀՀ օրենք /27. 10. 2007 թ., ՀՕ-223-Ն, ՀՀՊՏ 2007.11.28/59 (583): Հոդ.1197:):

#### **4. Ավարտական աշխատանքի և մագիստրոսական թեզի պաշտպանության նախապատրաստումը**

21. Ավարտական աշխատանքի պաշտպանությունից առնվազն վեց շաբաթ առաջ իրականացվում է ավարտական աշխատանքի ղեկավարի ստուգարքի (դիֆստուգարք) հանձնում: Ավարտական աշխատանքի ղեկավարի ստուգարքը (դիֆստուգարք) դրական է գնահատվում, եթե ավարտական աշխատանքը համապատասխանում է սույն կարգի պահանջներին: Ավարտական աշխատանքը և մագիստրոսական թեզը թողարկող ամբիոն են ներկայացվում դրանց պաշտպանությունից առնվազն մեկ ամիս առաջ:

22. Ավարտական աշխատանքի և մագիստրոսական թեզի վերաբերյալ ամբիոնի կողմից պատրաստվում է կարծիք, որը քննարկվում է ամբիոնի նիստում: Ամբիոնի տվյալ նիստին կարող է մասնակցել նաև սովորողի ղեկավարը:

23. Ամբիոնի կարծիքը պարունակում է հիմնավորված հետևություն սույն կարգի պահանջներին ավարտական աշխատանքի կամ մագիստրոսական թեզի համապատասխանության, ինչպես նաև եզրահանգում՝ ավարտական աշխատանքը կամ մագիստրոսական թեզը հրապարակային պաշտպանության ենթակա լինելու մասին:

24. Ավարտական աշխատանքի և մագիստրոսական թեզի հեղինակն ու ղեկավարը ստորագրում են հայերեն լեզվով տիտղոսաթերթի վրա:

25. Ամբիոնը կազմակերպվում է ավարտական աշխատանքի արտաքին կամ ներքին, իսկ մագիստրոսական թեզի դեպքում միայն արտաքին գրախոսում:

26. Ամփոփիչ ատեստավորման մեկնարկից առնվազն երեք օր առաջ ամբիոնը կրթահամալիրի ռեկտորին ուղղված զեկուցագրով ներկայացնում է տեղեկանք՝ ավարտական աշխատանքի կամ մագիստրոսական թեզի, ինչպես նաև դրանց վերաբերյալ ամբիոնի կարծիքի և արտաքին գրախոսականի մասին: Տեղեկանքում նշվում են նաև ավարտական աշխատանք և մագիստրոսական թեզ չներկայացրած և վերահանձնող շրջանավարտների վերաբերյալ տվյալները:

27. Սույն կարգի 26-րդ կետով նախատեսված զեկուցագիրը և տեղեկանքը, ամփոփիչ ատեստավորման ավարտից հետո, պահվում են քարտուղարությունում:

Ավարտական աշխատանքը կամ մագիստրոսական թեզը պահվում են ՀՀ ՆԳՆ կրթահամալիրի ընդհանուր գրադարանում: Ավարտական աշխատանքի կամ մագիստրոսական թեզի վերաբերյալ ամբիոնի կարծիքը և արտաքին գրախոսականը պահվում են ամբիոնում:

28. Ավարտական աշխատանքը կամ մագիստրոսական թեզն արտաքին գրախոսման են ենթակա համապատասխան ոլորտի գիտական աստիճան ունեցող անձի կամ համապատասխան մասնագետի կողմից: Կրթահամալիրի հաստիքային աշխատողը չի կարող լինել արտաքին գրախոսող:

29. Արտաքին գրախոսականը պարունակում է ավարտական աշխատանքի կամ մագիստրոսական թեզի շրջանակներում կատարված հետազոտության համապարփակ ուսումնասիրման արդյունքները, որի շրջանակներում գնահատական է տրվում և՛ հետազոտության ընթացքին և՛ հետազոտության արդյունքում արված եզրակացությանը:

## **5. Ավարտական աշխատանքի և մագիստրոսական թեզի պաշտպանությունը**

30. Ավարտական աշխատանքի և մագիստրոսական թեզի պաշտպանությունը կատարվում է ամփոփիչ ատեստավորման հանձնաժողովի դռնբաց նիստում՝ հանձնաժողովի կազմի երկու երրորդից ոչ պակաս անդամների ներկայության դեպքում: Նախագահի կամ նրան փոխարինողի ներկայությունը պարտադիր է: Բացի հանձնաժողովի անդամներից պաշտպանությանը կարող են մասնակցել նաև ղեկավարը և գրախոսողը: Պաշտպանությունը տեղի է ունենում հրապարակային և բանավոր կարգով:

31. Ամփոփիչ ատեստավորման հանձնաժողովի ձևավորումը կատարվում է բակալավրի և մագիստրոսի կրթական ծրագրերով ուսումնական գործընթացի կազմակերպման կարգի սահմանած պահանջների համաձայն:

32. Ավարտական աշխատանքի և մագիստրոսական թեզի պաշտպանության ընթացակարգային պահանջների համաձայն՝ Կրթահամալիրի սովորողների (բացառությամբ պետական պատվերի շրջանակներում սովորող ուստիկանության և փրկարար ծառայողների) ամփոփիչ ատեստավորման ընթացքն արձանագրվում և ձայնագրվում է: Ձայնագրությունը պահպանվում է արդյունքները հրապարակելուց հետո 6 ամիս:

33. Ավարտական աշխատանքի և մագիստրոսական թեզի բովանդակությունը ներկայացնելու համար յուրաքանչյուր սովորողի տրվում է մինչև 10 րոպե ժամանակ: Ելույթի ընթացքում պետք է ներկայացվի աշխատանքի արդիականությունը, ուսումնասիրված հիմնախնդիրը, աշխատանքի համառոտ բովանդակությունը՝ հիմնական ուշադրությունը դարձնելով եզրակացության հատվածին:

34. Ավարտական աշխատանքի և մագիստրոսական թեզի բովանդակությունը ներկայացնելուց հետո հանձնաժողովի քարտուղարն ընթերցում է ամբիոնի կարծիքը և, գրախոսողի բացակայության դեպքում, նաև արտաքին գրախոսականը, որից

հետո սովորողը պատասխանում է ամբիոնի կարծիքում և արտաքին գրախոսականում առկա նկատառումներին կամ դիտողություններին՝ համաձայնելով դրանց հետ կամ ներկայացնելով իր տեսակետի հիմնավոր բացատրությունը:

35. Ամբիոնի կարծիքում և արտաքին գրախոսականում առկա նկատառումներին կամ դիտողություններին պատասխանելուց հետո հանձնաժողովի անդամները և պաշտպանությանը ներկա գտնվող անձինք սովորողին կարող են հարցեր ուղղել:

36. Միջին մասնագիտական կրթական ծրագրով սովորողի հեղինակած ավարտական աշխատանքի պաշտպանության արդյունքները գնահատվում են «գերազանց», «լավ», «բավարար», «անբավարար» գնահատականներով՝ գնահատման 10 միավորանոց սանդղակով՝ ստորև նշված սխեմային համապատասխան.

| Գնահատման միավոր | Գնահատականը տառանշումով |
|------------------|-------------------------|
| 9-10             | Գերազանց                |
| 7-8              | Լավ                     |
| 4-6              | Բավարար                 |
| 0-3              | Անբավարար               |

37. Բակալավրիատի սովորողի հեղինակած ավարտական աշխատանքի կամ մագիստրոսական թեզի պաշտպանության արդյունքները գնահատվում են «գերազանց», «լավ», «բավարար», «անբավարար» գնահատականներով՝ գնահատման 20 միավորանոց սանդղակով՝ ստորև նշված սխեմային համապատասխան.

| Գնահատման միավոր | Գնահատականը տառանշումով |
|------------------|-------------------------|
| 18-20            | Գերազանց                |
| 13-17            | Լավ                     |
| 8-12             | Բավարար                 |
| 0-7              | Անբավարար               |

38. Միջին մասնագիտական կրթական ծրագրով սովորողի հեղինակած ավարտական աշխատանքի պաշտպանության գնահատման ընդհանուր որակական չափանիշների համար սահմանվում են գնահատման միավորների հետևյալ չափաքանակները.

Աղյուսակ 1

| №                | Չափանիշը                                               | Առավելագույն միավորը |
|------------------|--------------------------------------------------------|----------------------|
| 1                | Ներկայացման որակը                                      | 4                    |
| 2                | Ձևակերպման որակը և կատարման ինքնուրույնության աստիճանը | 4                    |
| 3                | Արդիականությունը (նորրոյթը)                            | 2                    |
| <b>Ընդամենը՝</b> |                                                        | <b>10</b>            |



39. Բակալավրիատի սովորողի կողմից պատրաստած ավարտական աշխատանքի պաշտպանության գնահատման ընդհանուր որակական չափանիշների համար սահմանվում են գնահատման միավորների հետևյալ չափաքանակները.

Աղյուսակ 2

| №                | Չափանիշը                            | Առավելագույն միավորը |
|------------------|-------------------------------------|----------------------|
| 1                | Ներկայացման որակը                   | 6                    |
| 2                | Ձևակերպման որակը                    | 6                    |
| 3                | Կատարման ինքնուրույնության աստիճանը | 6                    |
| 4                | Արդիականությունը (նորույթը)         | 2                    |
| <b>Ընդամենը՝</b> |                                     | <b>20</b>            |

40. Մագիստրոսական թեզի պաշտպանության գնահատման ընդհանուր որակական չափանիշների համար սահմանվում են գնահատման միավորների հետևյալ չափաքանակները.

Աղյուսակ 3

| №                | Չափանիշը                            | Առավելագույն միավորը |
|------------------|-------------------------------------|----------------------|
| 1                | Արդիականությունը (նորույթը)         | 6                    |
| 2                | Կատարման ինքնուրույնության աստիճանը | 6                    |
| 3                | Ձևակերպման որակը                    | 4                    |
| 4                | Ներկայացման որակը                   | 4                    |
| <b>Ընդամենը՝</b> |                                     | <b>20</b>            |

41. Ավարտական աշխատանքի և մագիստրոսական թեզի պաշտպանության արդյունքները հայտարարվում են նույն օրը՝ ամփոփիչ ատեստավորման հանձնաժողովի նիստի արձանագրությունը կազմելուց հետո մեկ ժամվա ընթացքում:

42. Ավարտական աշխատանքի և մագիստրոսական թեզի պաշտպանության հանձնաժողովի բոլոր որոշումները քարտուղարի կողմից արձանագրվում են արձանագրությունների մատյանում: Արձանագրությունները ստորագրում են հանձնաժողովի նախագահը և հանձնաժողովի՝ նիստին մասնակցած անդամները:

43. Ավարտական աշխատանքի կամ մագիստրոսական թեզի պաշտպանությանն անհարգելի չներկայանալը հավասարեցվում է «անբավարար» գնահատականի: Ավարտական աշխատանքը չներկայացնելը հավասարեցվում է «անբավարար» գնահատականի: Ավարտական աշխատանքը չներկայացնելու դեպքում ամփոփիչ ատեստավորման հանձնաժողովի նիստի արձանագրությունում կատարվում է «Չի ներկայացրել» նշումը: Ավարտական աշխատանքը չներկայացրած անձը, ցանկության դեպքում, ՀՀ ՆԳՆ կրթահամալիրի ղեկավարին հասցեագրված

զեկուցագրի (դիմումի) հիման վրա, հաջորդ ուսումնական տարում շարունակում է նախապես հաստատված թեմայով հետազոտությունը՝ ամբիոնում:

44. Ավարտական աշխատանքի կամ մագիստրոսական թեզի պաշտպանությանը չներկայացած անձը կարող է դիմել ՀՀ ՆԳՆ կրթահամալիրի ռեկտորին՝ թույլատրելու իրեն մասնակցել ավարտական աշխատանքի կամ մագիստրոսական թեզի պաշտպանությանը՝ զեկուցագրում (դիմումում) շարադրելով չներկայանալու հարգելի պատճառները:

45. ՀՀ ՆԳՆ կրթահամալիրի ռեկտորի կողմից կրթահամալիրի սովորողի խնդրանքը բավարարելու դեպքում ավարտական աշխատանքի կամ մագիստրոսական թեզի պաշտպանությունը տեղի է ունենում նույն կուրսի մյուս խմբերի պաշտպանության ժամանակ կամ ՀՀ ՆԳՆ կրթահամալիրի ռեկտորի կողմից նշանակված օրը:

46. «Անբավարար» գնահատական ստանալը կամ պաշտպանությանը անհարգելի կերպով չներկայանալը չի զրկում անձին ավարտական աշխատանքը կամ մագիստրոսական թեզը հետագայում պաշտպանելու իրավունքից: Ավարտական աշխատանքի կամ մագիստրոսական թեզի պաշտպանության վերահանձնման ցանկության դեպքում, ՀՀ ՆԳՆ կրթահամալիրի ռեկտորին հասցեագրված զեկուցագրի (դիմումի) հիման վրա, սովորողը կցվում է համապատասխան ամբիոնին և ստանում ավարտական աշխատանքի կամ մագիստրոսական թեզի նոր թեմա, իսկ ավարտական աշխատանքի կամ մագիստրոսական թեզի պատրաստումն ու պաշտպանությունն իրականացվում է ընդհանուր կարգով:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՆԵՐՔԻՆ ԳՈՐԾԵՐԻ ՆԱԽԱՐԱՐՈՒԹՅԱՆ  
ԿՐԹԱՀԱՄԱԼԻՐ  
ՈՒՍՈՒՄՆԱԿԱՆ ՍՏՈՐԱԲԱԺԱՆՈՒՄ**

----- ԱՄԲԻՈՆ

**ԱՎԱՐՏԱԿԱՆ ԱՇԽԱՏԱՆՔ**

Հեղինակ՝ ուսրիկանության ավագ սերժանտ Պողոս Պողոսի Պողոսյան

Թեմա՝ Վարչական իրավահարաբերություններ

Ղեկավար՝ իրավ. գիյր. թեկնածու, դոցենտ

Ս. Սիմոնյան

Հանձնված է «\_\_\_\_\_» \_\_\_\_\_ 2025 թ.

Գրախոսված է «\_\_\_\_\_» \_\_\_\_\_ 2025 թ.

«Թույլատրել պաշտպանության»

ամբիոնի պետ, իրավ. գիյր. թեկնածու, դոցենտ

ուսրիկանության մայոր \_\_\_\_\_ Գ. Խուդոյան

Պաշտպանված է «\_\_\_\_\_» \_\_\_\_\_ 2025թ.

Գնահատականը \_\_\_\_\_

Պետական քննական հանձնաժողովի

նախագահ \_\_\_\_\_

**Ե Ր Ե Վ Ա Ն 2 0 2 5**

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՆԵՐՔԻՆ ԳՈՐԾԵՐԻ ՆԱԽԱՐԱՐՈՒԹՅԱՆ  
ԿՐԹԱՀԱՄԱԼԻՐ

ՈՒՍՈՒՄՆԱԿԱՆ ՍՏՈՐԱԲԱԺԱՆՈՒՄ

-----ԱՄԲԻՈՆ

Մ Ա Գ Ի Ս Տ Ր Ո Ս Ա Կ Ա Ն Թ Ե Ձ

Հեղինակ՝ ոստիկանության ավագ սերժանտ Պողոս Պողոսի Պողոսյան  
Թեմա՝ Քրեական դատավարության սուբյեկտները

Ղեկավար՝ իրավ. գիյ. թեկնածու, դոցենտ

Ս. Սիմոնյան

Հանձնված է «\_\_\_\_\_» \_\_\_\_\_ 2025թ.

Գրախոսված է «\_\_\_\_\_» \_\_\_\_\_ 2025 թ.

«Թույլատրել պաշտպանության»

ամբիոնի պետ, իրավ. գիյ. թեկնածու, դոցենտ

ոստիկանության գնդապետ \_\_\_\_\_ Ա. Հովհաննիսյան

Պաշտպանված է «\_\_\_\_\_» \_\_\_\_\_ 2025թ.

Գնահատականը \_\_\_\_\_

Պետական քննական հանձնաժողովի

նախագահ \_\_\_\_\_

Ե Ր Ե Վ Ա Ն 2 0 2 5